



Martin Candinas flanco da Not Netzer (san.), igl president dall’Uniun da teir Surses, e da Daniel Albertin, igl mastral digl cumegn d’Albula/Alvra.



Vardan tge tgi lour amei sagetta. Er chegl totga tiers ena Festa feda teir.



Martin Candinas an discours cun Herbert ed Irma Fink-Simeon.

LAI



Gian-Reto Paterlini è siva da 20 onns president dall’Uniun da commers e mastirants Lai.

I spetga anc blera labour

Anc daple preschientscha vers anor, ena miglra percepziun ainten la franchisezza, la fegnameira è tgi l’uniun davainta ena marca, ma er en’uniun tgi veiva. Manageda è l’Uniun da commers e mastirants Lai. L’emna passada ò ella anvido alla radunanza generala.

GION NUTEGN STGIER/FMR SURMIRAN

L’emda passada ò l’Uniun da commers e mastirants Lai (HGV Lai) anvido alla radunanza generala 2026. Digls 91 commembers èn 27 stos preschaints cura tgi Gian-Reto Paterlini ò davert la radunanza generala. Igl punct cardinal digl onn2025 è sto l’elaboraziun dalla nova cumparsa dall’uniun, vot deir la creaziun d’en nov logo e la modernisaziun dalla homepage. Per chella labour è stada responsabla la suprastanta Nathalie Ziswiler. Da nov ò igl HGV Lai er en post da gestiun per igl qual Judith Weber è responsabla. Igls differents antops (Stamms) tgi on gia li mintgamai l’amprema gievgia digl meis èn stos bagn occupos a partair digl otgover 2025 anfignen igl avregl 2026 cun radond 15 commembers e commembras. Er anfignen la fegn da chest onn vignan chels antops ad avoir li. I vignan per part preschentos referats, tractos temas tgi èn nizevels per tot igls commembers e las commembras digl HGV Lai, ed a mantger vignan er betg fatgs politics, economics e turistics.

Per l’ampremageda alla Viva la Strada

Esser pi preschaint, esser pi manevèl agls commembers, far pi an-cunaschaint l’economia locala ed igl HGV Lai è venavant ena fegnameira ed ena sfeida per l’uniun. Uscheia on gia li siva digl mez digl 2025 ples occurrenzas, noua tg’igl HGV Lai è sto participo. En grond success er per igl HGV è stada l’amprema exposiziun da professiuns tgi ò gia li igls 2 da settember 2025 ainten la sala da cultura a Lai. Radond 20 menaschis èn sa participos chegl tgi è ena cefra respectabla. Igls 8 da settember 2026 ò li la sagonda exposiziun da professiuns puspe ainten la sala da cultura a Lai.

Igl aton passo, igls 2 d’otgover 2025 ò gia li igl «Job-Info-Tag». Chel de pon scolaras e scolaras dalla sagonda superioura Lai survagneir en’invista ainten ena professiun tscharneida. Igl «Job-Info-Tag 2026» ò li chest onn igls 1. d’otgover 2026.

Er l’occurrenza Viva la Strada è ena bunga occasiun da sa preschentar ad en grond domber da persungas. Per l’amprema geda vign igl HGV Lai ad esser dalla parteida cun en stand igls 15 ed igls 22 da fanadur 2026 a chel evenimaint da stad cun success gio dad onns ainten la regiun da vacanzas da Lai.

Igl avigneir dall’uniun

Fegnameiras digl nov onn dall’uniun èn per igl HGV Lai vers anor anc bler daple preschientscha, la vischinanza tigl commembers e las commembras pero er da recrutar novs menaschis e persvader tge tgi l’uniun vala veiramaintg. Igl HGV Lai duess davantar ena ferma marca ainten l’antièra regiun, gea perfign aint igl antier cantun. Vivaint, innovativ, palpabel, dinamic e cler – uscheia duess igl HGV Lai neir percepia aint igl avigneir. Las ampremas maseiras per en bung fundamaint d’uniun èn neidas fatgas, otras duessan suandar.



Dalla parteida vign l’uniun proximamaintg er ad esser cun en stand all’occurrenza turistica Viva la Strada a Lai.

RONA

A Rona èn tiradours e tiradouras stos igl pi bagn

A Rona è la Festa federala da teir eida a fegn l’emda passada cun la viseta da Martin Candinas, igl president digl comite d’organisaziun. El ò purto cumplimaints agls organisatours surmirans.

GION NUTEGN STGIER/FMR SURMIRAN

Er a Rona è dumengia passada allas 12.00 nia do igl davos schoz dalla 59avla Festa federala da teir. Durant tschintg fegns d’emda è er nia tratg agl stand da teir Livizung sen la distanza da 300 meters egn digls 16 stetgs. Per de on tranter 60 e 70 tiradours sagetto a Rona e chegl dalla dumang allas 07.30 anfignen allas 19.00. Vurdo tgi tot funcziunga dalla dumang alla seira on 20 persungas, seia chegl aint igl biro, aint igl stand e sa tgapescha ainten la tenda da festa.

Dalla Svizra franzosa a Rona

L’atmosfera è durant tots 15 deis stada grondiosa chegl cunzont cun participants e participantas neir tractos a Rona scu veir rètgs. Remarcabel è tuttegnna tgi radond 20 uniuns da teir dalla Svizra franzosa on tratg lour program dalla Festa federala da teir a Rona. Els on cunzont galdia la hospitalitad, gia plascheir da far cunaschientscha cun ena regiun tgi cunaschevan betg ed er stos ventirevels tgi er a Rona è nia discurreia franzos. Fitg simpaticas alloura er las uniuns digl cantun Berna, en cantun noua tgi igl sagettar ò er aint igl 2026 anc adegna en post fix per blers e bleras. Igl è er nia fatg an en cuntign festa e chegl schizont gronda festa.

Igls pi blers resungs positivs

Rona è sto egn da chels 19 stands externs nou tg’è nia sagetto igls total 2,5 milliuns colps dalla Festa federala da teir 2026. Chel stand è er sto igl stand cun la pi lunga distanza davent da Coira, noua tgi igl center dalla festa era. Singular è bagn tgi gist uniuns digl Grischun on er

«Igls pi blers cumplimaints, igls pi blers resungs positivs vaia retschet dallas uniuns pigl tractamaint a Rona.»

Martin Candinas, president digl comite d’organisaziun

tscharnia chel stand per sagettar lour program cun esser el betg aint igl manevèl dalla capitla grischuna, mabagn agl our digl perimeter digls 19 stands.

Fatg igl viadi da Coira a Rona ò dus deis avant la fegn dalla Festa federala da teir er Martin Candinas, igl president digl comite d’organisaziun dalla gronda occurrenza naziunala da teir 2026. El ò salido mintga persunga persunalmaintg e gia immens plascheir da far cunaschientscha cun blers tiradours e tiradouras dalla Romandie. En amei da parteida da Martin Candinas tg’è nia aposta a Rona per antupar igl cunsiglièr naziunal ò managea: «Cun santeir tè Martin a discorrer schi perfetg franzos, vessas an mintga cass pudia davantar cunsiglièr federal.»

Clers e bels plets ò el er drizzo agls organisatours dalla festa a Rona: «Igls pi blers cumplimaints, igls pi blers resungs positivs vaia retschet dallas uniuns pigl tractamaint a Rona, per l’organisaziun perfetga, la hospitalitad gentila e cunzont la cuschigna excellenta.» El vegia grond plascheir da tot chels resungs positivs. Els conferman tgi er en’uniun pi pitschna saptega organisar bagn ena festa an chella grondezza.

Anc mai vandia schi bleraint igl meis da zarcladour

Vurdo turisticamaintg è l’occurrenza naziunala da teir er stada per la regiun da vacanzas Surses en immens success. Cun pacas excepziuns on las uniuns pernotto ainten en hotel tranter Beiva e Casti u schiglio cunzont a Lai e curnturn. Gregorio Torriani, igl patrung digl Hotel Solaria a Beiva ò detg tgi igls tiradours seian stos fitg ampernevels giasts. Els vegian consumo e maglea bagn. El ò detg: «Anc mai vaia vandia schi bler vegn aint igl meis da zarcladour scu igl davos zarcladour.»

Igl gioven hotelier ò er menziuno tgi profito dalla Festa federala da teir vegia er la bar Trapla tgi totga tigl Hotel Solaria. Graztga agls tiradours seia la bar marschada scu da staschung d’anviern e chegl aint igl meis da zarcladour. En’uniun dalla Romandie ò betg lia durmeir ainten en hotel, catto persiva en li singular on igls tiradours sur Mon e chegl per star sur notg ainten en’acla ed ena tenda tipi d’Arthur Albertin. Or digl aspect turistic ed economic è la Festa federala da teir 2026 pigl antier Grischun Central damai sto en success.